

Zajednica osiguranja imovine i lica
" S A R A J E V O "

P R O J E K T
osiguranja i reosiguranja ZOI 1984 u Sarajevu

Sarajevo, septembra 1981. godine

P R O J E K T
osiguranja i reosiguranja ZOI 1984 u Sarajevu

U skladu sa predviđenim pripremama, organizacijom i održavanjem XIV Zimskih olimpijskih igara u Izvještaju koji je podnesen na 83. sjednici Međunarodnog olimpijskog Komiteta, konstatovano je da je neophodno utvrditi osnovne ciljeve i zadatke, finansijska sredstva, obim izgradnje sportskih objekata i borilišta itd, kako bi se igre u određenim i u vremenski utvrđenim fazama uspješno organizovale. Treba istaći da od načina na koji će se svi interesi, zatim takmičari, gosti, članovi ekipa, gledaoci, te objekti, sopstvena i iznajmljena oprema, itd. kvalitetno i pod najpovoljnijim uslovima i osigurati, zavisi u kojoj će se mjeri realizovati ciljevi i zadaci Organizatora ove sportske manifestacije. U tom cilju, u daljem izlaganju daje se prikaz potrebnih vrsta osiguranja koja su neposredno i posredno vezana za interes Organizacionog komiteta radi programskog uskladjivanja izdataka na ime premije osiguranja sa prethodno planiranim akcijama i finansijskim sredstvima.

U pogledu uskladjivanja finansijskih sredstava po osnovu premije osiguranja i obezbjedjenja punog osiguravajućeg pokrivača, pojavljuje se i nužnost reosiguranja pojedinih vrsta osiguranja, kako u zemlji, tako i na međunarodnom tržištu, koje već ima dovoljno iskustva sa osiguranjem i reosiguranjem sličnih sportskih priredaba (Olimpijske igre u Minhenu, Insbrucku i Lejk Plesidu, međunarodna fudbalska takmičenja - Evropski kup nacionalnih pobjednika 1981, Evropski kup nacionalnih pobjednika 1982, Evropski kup pobjednika kupova 1981, Evropski kup pobjednika kupova 1982, FIFA - Svjetski omladinski turnir 1981. itd).

1. Programiranje osiguravajućeg pokrivača

Programiranje osiguravajućeg pokrivača treba da prati osnovne etape organizacije igara, koje se u grubom mogu podijeliti u dvije grupe:

- (1) Pokrivača koja treba odmah da počnu, za period 1981 - 1984 i
- (2) Pokrivača za vrijeme igara 1984.

(I) Pokrića 1981 - 1984

U ovom periodu mogu da se postave zahtjevi sa slijedećim osiguravajućim pokrićima:

1) Osiguranje otkazivanja i napuštanja Igara

Cilj ovog osiguravajućeg pokrića je da se Organizatoru Igara - Osiguraniku, naknade njegovi gubici koji mogu da nastanu uslijed potpunog otkazivanja Igara ili napuštanja svih sportskih takmičenja koja je trebalo održati prema utvrdjenom programu, pripisivo nekom uzroku van kontrole Organizatora Igara - Osiguranika.

Pod izrazom "otkaz" podrazumijeva se nemogućnost Organizatora - Osiguranika, da održi sve igre ili cio sport/ove za vrijeme čitavog programiranog perioda, a pod izrazom "napuštanje" nemogućnost održavanja svih igara ili nekog sporta ili sportova u programiranom periodu koji preostaje nakon faktičnog otvaranja Igara.

Obim pokrića po ovom osiguranju bi bio Osiguranikov "PROCJENJENI NETO GUBITAK". Ovo je gubitak prihoda umanjen za bilo kakve uštede koje bi se i pored otkazivanja mogle ostvariti. Po ovom osiguranju se naknadjuju koji su veći:

- a) procjenjeni neto gubici (troškovi, odnosno cijena stvorenih ili ugovorenih obaveza)
- b) pretrpljenih procjenjenih gubitaka ugovorenih bruto prihoda (koje treba definisati i ugovoriti)

Definicija "PRIHODI" može biti utvrdjena prema osiguranikovim posebnim zahtjevima, a uobičajeno, može da uključi prihod od prodaje TV (radio) filmskih prava, ugovorenih prihoda od reklame i nekih ostalih prihoda. "PRIHOD" može da bude stvarno ostvareni i ugovoreni, ali još nerealizovani. Ovo može da uključi i pretprodaju ulaznica.

Pokriće (polica) bi obuhvatilo otkazivanje usljed fizičkog oštećenja olimpijskog sela i sredstava, ako ovo dovodi do otkazivanja ili napuštanja igara. U slučaju uključenja zemljotresa u pokriće, tražiće se posebne informacije i može da bude od posebnog značaja kod određivanja cijene - premije osiguranja.

Normalno, ne zaključuje se osiguranje otkazivanja ili napuštanja pojedinih sportskih disciplina, iako i one mogu biti pokrivena po većoj premijskoj stopi uz pružanje potrebnih informacija. Obično, to je moguće za discipline koje se mogu ponovo programirati.

Inicijalno, ratni rizici kao što su definisani, u polici osiguranja su isključeni. Dvanaest mjeseci prije otvaranja igara, može se zatražiti kvotacija (cijena osiguranja) od inostranih reosiguravača za uključivanje ratnih rizika. Dodatna premija za te rizike, zavisice od okolnosti u to vrijeme.


Osiguranjem se ne pokrivaju:

a) finansijski uzroci i/ili nedostatak potpore. Ovo isključenje je mandatorno. Finansijski uzroci uključuju finansijsku nesolventnost svake strane, finansijskog neuspjeha svakog poduhvata, svaki manjak prihoda od prodaje ili očekivane zarade svakog poduhvata. "Nedostatak potpore" odnosi se kako na nedostatak javne potpore, tako takodjer i nedovoljnog odziva takmičara.

b) povlačenje svakog pojedinačnog učesnika i/ili timova koji učestvuju u igrama i

c) potpuno suprotni vremenski uslovi

Tipičan, grafički prikaz troškova-prihoda, može se vidjeti iz slijedeće skice:



Informacije za dobijanje ponude osiguranja, odnosno kvotacije premije: Da bi se obezbijedila kvotacija sa inostranog tržišta, potrebno je obezbijediti sljedeće informacije:

1. Limit obešrećenja
2. Lista pokroviteljstva i sporazuma
3. Do koga obima sporazumi pokrovitelja vraćaju rizik na pokrovitelje - Kopija standardnog teksta ugovora
4. Neki detaljni o budžetiranim troškovima i prihodima u toku sljedećih 2-3 godine koji pokazuju neopozive obaveze i da li su i kada će ugovori biti stvarno potpisani
5. Informacije (brošure o skijaškim terenima. Koliko dugo traje skijaška sezona
6. Sredstva Olimpijskog sela (skijaška sredstva)
7. Završeni građevinski radovi - spiskovi - dinamika
8. Mjere sigurnosti koje će se preduzeti
9. Ako se uključuje zemljotres:

a) Konstrukcija Olimpijskog sela i sredstava za skijanje sa posebnim osvrtom na zemljotres

b) Seizmiološka mapa Jugoslavije i posebno Sarajeva. Frekvencija i magnituda prošlih zemljotresa na tom području

1o. Ako se traži pokriće za odlaganje pojedinačnih disciplina, ili povećanih troškova koji iz tog slijede:

a) Prethodni vremenski uslovi

b) Planovi Osiguranikovih mjera u slučaju nužde (tj. mašine za pravljenje snijega na stazi, alternative staze. itd.)

c) Limiti obeštećenja i definicija pokrića

2) Osiguranje otkazivanja i napuštanja Igara kod domaćih televizijskih centara - sopstvenih ulaganja -

Cilj ovog osiguravajućeg pokrića je da se osiguraniku naknade njegovi gubici iz sopstvenog ulaganja na organizaciji prenošenja Igara, a koji mogu da nastanu usljed potpunog otkazivanja Igara ili napuštanja svih sportskih takmičenja koja je trebalo održati prema utvrdjenom programu, pripisivo nekom uzroku van kontrole Osiguranika.

Svi ostali uslovi kod ovog osiguranja se primjenjuju kao kod tač. 1).

3) Kreditno osiguranje - potraživanje po osnovu prodaje obilježja olimpijskog znaka

Ovim osiguranjem pokriva se neostvarenje planiranog prihoda usljed odustajanja prenosa Igara od strane inostranih televizijskih kompanija ili neizvršenja obaveza zbog njihovog bankrotstva i sl. (komercijalnog rizika) i ratnih i političkih rizika u zemlji dužnika (TV kompanije).

Pošto je ova vrsta kreditnog osiguranja, to kod prethodno pomenutih igara nisu postavljeni zahtjevi za ovo pokriće.

Pokriće od komercijalnih rizika kod prethodnih osiguranja moglo bi se samo razmotriti u zemlji, s obzirom da inostrano tržište za sada smatra da se ovaj rizik ne može primati u pokriće, pa se sugerira da Organizator za svoj interes obezbijedi Bond (tj. bankarsku garanciju) za svakog korisnika olimpijskog znaka.

Osiguranje potraživanja od političkih i ratnih rizika izvršilo bi se u zemlji od strane Jugoslovenske banke za ekonomsku saradnju sa inostranstvom.

4) Osiguranje putničkih agencija - hotela za smještaj stranih gostiju

Cilj ovog osiguranja je pokriće putničkih agencija - hotela od povraćaja naplaćenih sredstava na ime hotelskog smještaja u slučaju otkaza i napuštanja igara, nepojavljivanja odredjenih nacionalnih ekipa i otkaza igara od strane nadležnih organa.

Pod "otkazom" se podrazumijeva nemogućnost organizatora da održi sve igre ili cio neki sport/ove za vrijeme čitavog programiranog perioda.

Pod "napuštanjem" se podrazumijeva nemogućnost organizatora da održi sve igre ili cio neki sport/ove za vrijeme čitavog programiranog perioda koji preostaje nakon faktičkog otvaranja igara.

Pod "nepojavljivanjem" odredjenih nacionalnih ekipa, podrazumijeva se nepojavljivanje cijelog olimpijskog tima zbog bilo kojeg uzroka van kontrole osiguranika.

Ovim pokrićem Osiguraniku se naknadjuje ukupan iznos ugovorenih sredstava na ime hotelskog smještaja.

5/ Osiguranje opšte odgovornosti

Ovim pokrićem se obeštećuje Osiguranik u slučaju njegove zakonske odgovornosti kao organizatora Igara.

Predloženo pokriće je široka forma pokrića zakonske odgovornosti i uključuje odgovornost za produkte, odgovornost za hranu i piće i izukrštenu odgovornost.

Pod "izukrštenom odgovornošću" daje se pokriće za odštetne zahtjeve podnijete od neke stranke unijete u policu osiguranja kao osiguranika, a protiv druge stranke, koja je isto tako osiguranik po datoj polici, da će se tretirati kao stranka od koje se traži odštetni zahtjev, kao da nije bila navedena kao osiguranik u polici. Osiguravač se odriče svih prava subrogacije koje može da ima ili da zahtjeva od neke pomenute stranke.

Postoje različita posebna pokrića koja se mogu razmatrati:

- a) Odgovornost takmičara prema takmičaru
- b) Odgovornost takmičara prema sudiji
- c) Sudije prema sudiji

Normalno je da se isključe odštetni zahtjevi podnijeti od sudija protiv I. O. C./Y. O. C. jer su sudije zaposlenici Osiguranika.

Polica normalno isključuje "libel copyright" i odgovornost prema trećim iz držanja motornih vozila.

Informacije za dobijanje ponude osiguranja, odnosno kvotacije premije:

- 1) Limit obeštećenja
- 2) Prihodi ukupno i pojedinačno: od gledaoca T.V. - Radio - Film -
- Knjige - fotografije, prava reklamiranja (državno pokroviteljstvo)

- 3) Aproximativan procjenjen broj takmičara
- 4) Aproximativan broj gledaoca
- 5) Da li takmičari potpisuju izjavu od odustajanja od prava na naknadu štete protiv I. O. C. / Y. O. C.

Prema odredjenim procjenama, limit obeštećenja od odgovornosti za slučaj smrti, povrede ili oštećenja zdravlja ili oštećenja ili uništenja stvari trećih lica, trebalo bi da se kreće najmanje u iznosu od 10.000.000 dolara po događaju, a za pomenute sportske događaje taj limit se kreće obično najmanje u iznosu od 20.000.000 dolara.

Normalno i kod ovog osiguranja postoje odredjena isključenja, kao odgovornost usljed držanja i posjedovanja motornih vozila, broda, aviona itd., zagađenja vazduha, vode, zemlje i ratnih rizika.

6) Osiguranje otkazivanja i napuštanja Igara
kod ostalih korisnika

Cilj ovog osiguravajućeg pokrivača je da se Osiguraniku naknadi njegov gubitak iz sopstvenog ulaganja u troškove propagande, eksploatacije, olimpijskih obilježja, kovanog novca, filatelije i olimpijske lutrije, a koji troškovi nisu osigurani po polici Organizacionog komiteta, a koji mogu da nastanu usljed potpunog otkazivanja Igara ili napuštanja svih sportskih takmičenja koja je trebalo održati prema utvrđenom programu, a pripisivo nekom uzroku van kontrole osiguranika.

Svi ostali uslovi kod ovog osiguranja se primjenjuju kao kod tačke 1.

7) Turistički paket pokrivača

Ovim osiguranjem se pokriva:

a) putnički prtljag od uništenja ili oštećenja, kao i ručni prtljag, putna odjeća na svim saobraćajnim sredstvima, mjestima boravišta (hoteli) i u kampovima

b) osiguranje nezgode turista za slučaj smrti, trajnog invaliditeta i troškova sahrane

c) odgovornost turista za slučaj smrti, povrede ili oštećenja zdravlja trećih lica ili oštećenje ili uništenje stvari trećih lica

d) zdravstveno osiguranje turista i to: troškove liječenja u inostranstvu, uključivši transportne troškove u slučaju bolesti (letovi u slučaju hitne pomoći) i troškovi prevoza u slučaju smrti sa posebnim sumama osiguranja za prevoz u evropske zemlje i za prevoz van Evrope

8) Osiguranje turista od odustajanja putovanja na Olimpijske igre usljed smrti, nezgode, teške bolesti osiguranika, supruge, djece, roditelja, braće, sestara, deda i baba.

Ovim osiguranjem se pokrivaju troškovi putovanja po odbitku određene franšize (učešća u šteti).

Osiguranjem se ne pokrivaju ratni i politički rizici.

9) Osiguranje pokretne imovine

Ovo osiguranje obuhvata pokrće kamera, opreme, elektronske opreme itd. od oštećenja, loma, uništenja, nestanka, kradje, požara i ostalih elementarnih nepogoda u toku prenosa i prevoza.

10) Osiguranje motornih vozila od oštećenja i od odgovornosti

Kod ovog osiguranja treba zaključiti potpuno kasko osiguranje i osiguranje od odgovornosti na veće sume od zakonom utvrdjenih minimalnih suma osiguranja koje sada za putnička vozila iznose 2.500.000 a za teretna vozila i autobuse 5.000.000 dinara po jednom događaju.

11) Osiguranje objekata u izgradnji i montaži

Ovo osiguranje obuhvata objekte u izgradnji i montaži i to:

1. JAHORINA: izgradnja i uređenje staza za alpske discipline, izgradnja uspinjača i pratećih objekata, opremanje press centra i uređenje parking prostora.

2. BJELAŠNICA: izgradnja, uređenje i opremanje staza za alpske discipline, izgradnja i opremanje uspinjača, izgradnja pratećih objekata i postavljanje mjernih i drugih uređaja, opremanje pomoćnog press centra i uređenje parking prostora.

3. IGMAN: izgradnja i uređenje centra za nordijske discipline, izgradnja pomoćnog olimpijskog sela, opremanje pomoćnog press centra i postavljanje mjernih i drugih uređaja.

Izgradnja 90 i 70 metarskih skakaonica i pratećih objekata uz postavljanje mjernih i drugih uređaja i opremanje pomoćnog press centra.

4. TREBEVIĆ: izgradnja kombinovane bob i sankaske staze dužine 1.500 m, izgradnja pratećih objekata, postavljanje mjernih i drugih uređaja i opremanje press centra.

5. ZETRA: izgradnja hale sa umjetnim ledom (60 x 30) i piste za brzinsko klizanje dužine 400 m, izgradnja pratećih objekata, postavljanje mjernih i drugih uređaja i opremanje pomoćnog press centra.

6. SKENDERIJA: izgradnja pomoćne i trening hale sa umjetnim ledom (60 x 30) i pratećih objekata, postavljanje mjernih i drugih uređaja i opremanje glavnog press centra.

12) Osiguranje inostranih funkcionera na radu i u posjeti kod Organizacionog komiteta od posljedica nesretnog slučaja (nezgode).

13) Osiguranje domaćih funkcionera na radu, koji nisu u stalnom radnom odnosu sa Organizacionim komitetom i u posjeti kod Organizacionog komiteta od posljedica nesretnog slučaja (nezgode).

14) Osiguranje učesnika probnih takmičenja (1983) od posljedica nesretnog slučaja (nezgode)

15) Osiguranje posjetilaca probnih takmičenja (1983) od posljedica nesretnog slučaja (nezgode)

Pod nesretnim slučajem (nezgodom) u smislu prethodno navedenih osiguranja od 11) + 14) smatra se svaki iznenadni i od volje osiguranika nezavisni događaj koji djelujući uglavnom spolja i naglo na tijelo osiguranika, ima za posljedicu njegovu smrt, odnosno potpuni ili djelimični invaliditet, prolaznu nesposobnost za rad ili narušenje zdravlja koje zahtjeva ljekarsku pomoć.

U smislu prethodnog stava, smatraju se nesretnim slučajem naročito slijedeći događaji: gušenje, sudar, udar kakvim predmetom ili o kakvi predmet, udar električne struje ili groma, pad, okliznuće, survavanje, ranjavanje oružjem ili raznim drugim predmetima, udar ili ujed životinje i ubod insekta, izuzev ako je takvim ubodom prouzrokovana kakva infektivna bolest.

(2) Pokriće za vrijeme igara

Za vrijeme igara ostala bi na snazi sva prethodno pomenuta osiguranja, osim izgradnje i montaže pomenutih objekata. Ova osiguranja pretvorila bi se u tekuća osiguranja izgradjenih i montiranih objekata.

II. Programiranje reosiguravajućih pokrića

U zavisnosti od vrste i visine pokrića (sume osiguranja) moralo bi se tražiti i inostrano pokriće posredstvom reosiguranja, a naročito za "osiguranje otkazivanja i napuštanja igara", kao i "opšte odgovornosti".

Za reosigurane vrste osiguranja iz prethodnog stava, cijenu osiguranja također bi utvrđivali inostrani reosiguravači.

Limit ukupnog pokriva u iznosu od 90 miliona dolara za "osiguranje otkazivanja i napuštanja igara" je upravo oko limita kapaciteta postojećeg svjetskog tržišta za taj tip rizika. Prema tome, kapacitet se može koristiti na principu "prvo lice na tržištu prvo će angažovati kapacitet". Imajući prethodno iznijeto u vidu, morali bi se postaviti slijedeći prioriteti kod plasmana odgovarajućih osiguranja:

1. Jugoslovenski olimpijski komitet,
2. Jugoslovenska televizija,
3. Jugoslovenske agencije i hoteli, prevoznačka preduzeća i aerodromi,
4. Drugi jugoslovenski interesi i
5. Inostrane turističke agencije.